

QVÆSTIO-  
NES QVATVOR  
CVM ADIVNCTIS AS-  
SERTIONIBVS, QVIBVS  
præcipua quædam capita doctrinæ  
cœlestis comprehenduntur,

Futuris Doctõribus  
Theologiæ propositæ Lipsiæ  
V. I D. Septembris, & postea  
ab iisdem publica Disputa-  
tione repetitæ.



L I P S I Æ

Iohannes Rhamba excudebat  
Anno

---

M. D. LXXIII.



I.

*Prima Quæstio tradita D.*

*Vuolfgango Hardero.*

Q V Æ S T I O.

[ Homo ad imaginem D E I con-  
ditus, propter peccatum, quod  
suadente Sathana per hominem  
introijt in mundum : Estq; defe-  
ctus, inclinatio & actio pugnans  
cum lege Dei & offendens De-  
um :

V. • Sit miserijs & ipsi morti in hac  
vita subiectus, ac reus coram  
Deo æternarum pœnarum, nisi  
facta fuerit originalis & actualis  
peccati propter Mediatorem  
Christum remissio ?

I.

**Q**uemadmodum sola Christi Ecclesia, reli-  
qua Christiana religionis vera dogmata  
ex verbo diuinitus reuelato cognoscit &  
tenet : ita & verum iudicium sententi-  
amq; ex testimonijs Prophetarum & Apostolorum  
de peccato, vnde, & quid sit peccatum, habet &  
pronunciat.

I I.

Mirati sunt viri sapientes, & adhuc mirantur, vnde sit in genere humano tanta confusio, dissidium rationis & affectuum, varia scelerum, calamitatum ac morborum genera: Et ipsa denique mors: cum Deus sit causa boni in natura, & cum ordo naturæ plurimis in rebus talis obseruetur, ut creatura diuinis præscriptis legibus obtemperent. Oritur enim & occidit Sol quotidie, crescit ac decrescit singulis mensibus Luna, feruntur motu suo Planeta, crescunt herba, conseruantur generatione species animalium, etiam ratione carentium, manentq; perennitates fluminum.

I I I.

Vera piaq; est sententia, viraq; manu & tonpectore in Ecclesia Christi tenenda: Deum non esse autorem seu conditorem peccati, nec uelle nec approbare peccata, sed horribiliter irasci peccato, & odio id prosequi, & iram suam aduersus hominum peccata; per legem per λύτρον quod soluit Christus pro peccatis hominum, & deniq; per alias innumera- biles calamitates, quibus homines opprimuntur, declarasse & manifestasse. Vnde Moses ait: Vidit Deus omnia quæ fecerat, & erant ualde bona. Et Dauid inquit: Non Deus uolens iniquitatem tuas. Zachar. 8. Vnusquisq; malum contra amicum suum ne cogitetis in cordibus uestris, & iuramentum mendax ne diligatis. Omnia enim hæc sunt quæ odi, dicit Dominus. Testatur & Ioh. concupiscentiam carnis non ex Deo esse, sed ex mundo, & idem refert



refert in Euangelica sua historia, Omnia per Christum facta, & sine ipso factum esse nihil. Et dignū est hoc loco consideratione D. Augustini testimonium, quod extat in enarratione Psal. 68. Iniquitas non est natura, quam formauit Deus, sed iniquitas est peruersitas, quam fecit homo. Item: Natura per Deum facta sunt, iniquitas per ipsum facta non est.

### IIII.

Voluntatem Diaboli qui falsa promissione persuasit mulieri, vt contra diuinum praeceptum de prohibito fructu comederet, & hominis voluntatem, qua primi parentes liberè se auerterunt à Deo, causam esse peccati, communi Catholica Ecclesia consensu, claris testimonijs Scriptura nitente, omisis intricatis periculosisq; disputationibus, & labyrinthis affirmamus. Introijt enim per vnum hominem peccatum in mundum, & propter peccatum mors, & sic in omnes homines mors peruasit in eo quod omnes peccauimus. Non est peccatum res condita à Deo, auertit se primus homo libertate voluntatis suae à Deo, & excusit dona Dei, & secuta est post lapsum horrenda destructio, quam postea propagauit in omnem posteritatem suam.

### V.

Nomen peccati in ecclesiastica doctrina, non modo significat viciosas internas & externas actiones pugnantes cum recta rationis iudicio, sed etiam congenitam quandam naturam prauitatem:

fontem radicemq<sup>3</sup>, reliquorum peccatorum, malumq<sup>3</sup>, pugnās cum lege Dei, vnde communem peccati descriptionem, quam Magist. Sententiarum Lib. 2. distinct. 35. ex libro 2 2. cap. 27. contra Faustum Aug. mutuò acceptam tradidit: Peccatum est omne dictum, uel factum, uel concupitum contra legem Dei, insufficientem esse asserimus.

V I.

Pia, erudita, brevis definitio traditur in Iohannis 1. Epistola capit. 3. ἁμαρτία ὅτι οὐκ ἔστιν ὡς νόμος: Peccatum est quicquid est contra legem Dei, quicquid dissentit à norma legis diuinæ. Debet autem hac peccati definitio intelligi, non modo de uiciosis actionibus, sed etiam de interioribus defectibus, caligine in mente, auersione in voluntate, contumacia in corde, & de ipso reatu, quo homo rem est aeterna ira Dei, & pœna propter peccatum. Hinc in Ecclesia & Schola nostra retinemus quoq<sup>3</sup>, communem peccati definitionem, qua verba Apost. Iohannis explicantur: Peccatum est defectus, inclinatio & actio pugnās cum lege Dei, & ream faciens creaturam aeterna ira, nisi fiat remissio propter Mediatorem Christum. Accipitur interdum quoq<sup>3</sup>, more Prophetarum & Apostolorum dictio peccati, pro oblatione siue víctima, qua offertur pro peccatis. Hos. cap. 4. Peccatum populi commedunt, & anima eorum delectatur iniquitate eorum. 2. Cor. 5. Τὸν γὰρ μὴ γνόντα ἁμαρτίαν ὑπὲρ ἡμῶν ἁμαρτίαν ἐποίησεν.

Præla-

## VII.

*Praclara sunt in scripturis Prophetis & Apostolicis sententia, quae affirmant homines post lapsum primorum parentum, secundum naturam propagatos cum peccato nasci, non sibi enim solum primus homo delinquendo corruptionem naturae, mortem, aeternam poenam accersivit, sed simul etiam in idem exitium omnes posteros suos coniecit & precipitavit. Transiit enim peccatum & corruptio naturae, una cum reatu à primis parentibus in ipsorum posteritatem, sicut putredo radicis in ramos, & lepra parentum in liberos transfundi & transmitti solet.*

## VIII.

*Non igitur rea est hominum natura tantum propter primi hominis delictum, sed simul corrupta viciataque est in omnibus partibus, & rea est quoque propria culpa secundum scripturae testimonia, Genes. 6. & 8. Figmentum seu plasma cogitationum & cordis malum à pueritia. Ierem. 17. Cor hominis peruersum & arumnosum. Psal. 51. Ecce in iniquitatibus conceptus sum, & in peccatis concepit me mater mea. Ephes. cap. 2. Eramus natura filij irae quemadmodum & ceteri. August. de fide ad Petrum Diaconum cap. 26. inquit: Firmissime tene & nullatenus dubites, Omnem hominem, qui per concubitum viri & mulieris concipitur, cum peccato originali nasci, impietati subditum, mortis subiectum, & ob hoc naturae irae filium nasci, à qua ira nullus liberatur nisi per fidem Mediatoris*

Dei & hominis, IESV CHRISTI, qui sine peccato conceptus, sine peccato natus, sine peccato mortuus, peccatum pro nobis factus est, id est, sacrificium factus est pro peccatis nostris.

I X.

Hinc veteres docendi gratia duas peccati species tradiderunt, quarum alteram peccatum Originale, alteram Actuale nominarunt. Comprehendimus autem nomine peccati originis, reatum propter Adæ lapsum, propter priuationem, defectum lucis diuinæ, firmæ agnitionis Dei in mentibus hominum, & propter auersionem voluntatis à Deo, ac propter contumaciam cordis, quæ mala secuta sunt omnia lapsum primorum parentum in natura hominum, & sunt inimicitia aduersus Deum, pugnantes cum lege diuinæ, & damnata à Deo. Habent nati ex virili semine varios defectus & prauam concupiscentiam, carent luce in mente vera, videlicet noticia Dei, vera dilectione Dei & fide, non habent vim, potentiam siue donum efficiendi timorem Dei, & fiduciam erga Deum diligendi Deum, & implendi legem Dei, sed adest cæcitas mentis, auersio voluntatis à Deo, contumacia cordis repugnans legi Dei, horrenda denique & traxio, in reliquis viribus humanis, corruptio natura, deprauatio imaginis Dei, ad quam homo conditus fuit. Hanc naturæ corruptionem siue defectum significarunt etiam scholastici doctores suis peccati Originis descriptionibus. Hugo affirmat peccatum origi-

originale esse ignorantiam in mente, & concupiscentiam in carne. Anselmus statuit hoc idem, peccatum esse carentiam iustitiae Originalis debita inesse. Significatq; iustitia Originalis acceptionem & rectitudinem quae fuit ante lapsum, videlicet lucem & firmam agnitionem Dei in mente hominis, & congruentiam voluntarij & cordis cum Deo, qui in hominibus uelut in templo suo habitasset, & suam sapientiam, iustitiam & leticiam eis communicasset, si non essent lapsi. Hinc conqueritur Paulus de corruptione naturae humanae Roman. 3. Omnes peccauerunt & destituuntur gloria Dei. Rom. 8. Affectus carnis inimica est aduersus Deum, nam legi Dei non subditur, siquidem ne potest quidem. 1. Cor. 2. Animalis homo non accipit ea quae sunt Spiritus.

#### X.

Reliquias quoq; post lapsum imaginis Dei, ut sunt noticiæ in mente σοφῶν φρονῶν in corde, & libertas regendi locomotiuam in voluntate, actiones, motus, appetitiones naturales, intellectus & voluntatis & cordis, deprauatas pollutasq; esse iudicamus peccato originis.

#### XI.

Intelligimus porro in Ecclesia doctrina, nomine peccati, non solum commemoratos defectus siue morbos naturae, seu legem membrorum, concupiscentiam carnis siue materiale, siue fomitem

A 5                      peccati,



peccati, ut Scholaſtici nominarunt, ſed etiam ſormale peccati, ipſum reatum, homines nimirum propter lapſum primorum parentum, propter naturæ corruptionem, defectus, prauas inclinationes, coram Deo reos eſſe, dignos morte æterna, & mereri pœnas tum temporales tum æternas. Hinc Apoſtolus ſtatuit homines natura eſſe filios iræ, & per vnius hominis inobædientiam multos conſtitutos eſſe peccatores, & peruaſiſſe mortem in omnes homines. Quemadmodum enim per Adam omnes moriuntur: ita per Chriſtum omnes viuificabuntur. Maledictus etiam, ait Moſes, qui non permanſerit in lege, ut faciat ea.

## XII.

Tria ſunt grauiffima teſtimonia, quæ ſtudent magnitudinem peccati originis, quod ſit nimirum ἀνομία, id eſt, res diſcrepans à lege Dei: dignitas victima filij Dei, qui λύτρον perſoluit pro peccatis hominum: magnitudo calamitatum humanarum, & ipſa mors, quibus ſancti homines, & ipſi infantes teneræ ætatis ſubiectioni ſunt: tandem & ipſi piorum lapſus. Dubitauit Moſes ad rupem, vnde aquam elicere iuſſus fuerat. Affenſit Aaron facientibus vitulum. Incidit Dauid in adulterium, homicidium, & in reliqua peccata.

## XIII.

Errant igitur, qui more Philoſophorum & Ieſuitarum, dictionem peccati de externa tantum actione,

actione, & non etiam de corruptione natura intelligunt, & nihil habere rationem peccati affirmant, nisi quod fiat à consentiente & volente. Errant etiam qui sentiūt peccatum originale tantum reatum esse siue pœnam, conditionem, seruitutem mortis, propter lapsum primorum parentum, & non esse positivam aliquam pravitatem harentem in natura humana, nec post baptismum vicium originale rectè vereq<sub>3</sub> sua natura dici & esse peccatum, sed tantum fomitem siue causam peccati esse quiddam ἀδὲ ἰαφρογορ.

#### XIIII.

Damnamus Pelagianos, qui negant peccatum originis & tradunt homines, imitatione tantum fieri peccatores inobœdientia primorum parentum, & humanis viribus posse legem Dei implere, ac iustos pronunciari coram Deo, propter honesta rationis opera, quam opinionem etiam Phariseos & Monachos olim defendisse constat.

#### XV.

Detestamur insuper impium & absurdum dogma Manicheorum veterum & recentium, qui duos Deos seu conditores bonum nimirum & malum finxerunt, & hominem nondum renatum post lapsum primorum parentum, esse creaturam sathana, & humano cordi impressam, informatamq<sub>3</sub> esse imaginem Diaboli, & aliam substantiam in homine effectam esse à sathana, ac deniq<sub>3</sub> peccatum originale

originale esse animam hominis rationalem, quorum erroribus pugnantibus contra primum symboli Apostolici articulum, hoc loco tantum opponere placuit diui Augustini sententiam, & scriptura quadam testimonia, quibus manifestum fit, hominem, creaturam, opus donumq; Dei esse, ac discernendam esse inter naturam ipsam, qua per se bona, & à Deo est, & inter viciū, quo natura hominū per peccatum Adā deprauata est. August. de natura & gratia contra Pelagianos cap. 3. Omnia bona, qua habet natura hominis in formatione, vita, sensibus, mente, à summo Deo habet creatore & artifice suo, Viciū uero, quod ista naturalia bona contenebrat & infirmat, vt illuminatione, curatione opus habeat, non ab inculpabili artifice cōtractum est, sed ex Originali peccato quod commissum est libero arbitrio. Et tractatu 42. super Iohan. inquit idem autor: Quod homo est ex Deo est, quod peccator, non ex Deo. A natura viciū secernatur, agnoscatur natura, vnde creator laudetur, agnoscatur viciū, propter quod medicus inuocetur. Genes. 33. Paruuli sunt quos donauit mihi Deus seruo tuo. Iob. 31. Quid faciam cum surrexerit ad iudicandum Deus, & cum quaesierit quid respondebo illi? Nunquid nō in vtero fecit me, & qui & illum operatus est, & formauit me in vulua unus? Psal. 100. Scitote quoniam Dominus ipse est Deus, ipse fecit nos, & non ipsi nos. Psal. 139. Informem massam meam viderunt oculi tui &c. Iohan. 1. Omnia per ipsum facta sunt: Item: Pater meus adhuc operatur & ego operor.

# XVI.

Est porro peccatum originale uelut fornax accensa, qua sine intermissione alia peccata & scelera efflat, quibus ira Dei magis prouocatur, & maior paratur pernities. Hinc enim pullulascunt uiciosi affectus: Dubitatio de Deo, diffidentia, neglectio cœlestis doctrina, temeritas in fingendis opinionibus & cultibus. Hinc erumpunt improbae voces, quibus odia, inimicitia, parricidia, & alia quamplurima mala nascuntur, contra legem Dei. Hinc Christus dixit Mat. 12. & 15. Malus homo ex malo thesauro depromit mala. Item: Ex corde exeunt cogitationes malae, caedes, adulteria, stupra, furta, falsa testimonia & conuicia. Rom. 7. Peccatum in me genuit concupiscentiam omnem. Iacob. 1. Vnusquisq; tentatur, dum à propria concupiscentia abstrahitur & inescatur. Deinde concupiscentia postquam concepit parit peccatum, peccatum uero perfectum progignit mortem.

# XVII.

Quaquam credentibus in Christum & baptizatis in mortem ipsius, omnia peccata propter uerum & perpetuum Samaritanum Christum uerè remittuntur, tolluntur ab eis reatus, poena aeterna, sanantur vulnera à latronibus inflicta, regenerantur Spiritu & aqua, & inchoatur in eis restitutio imaginis Dei, ad quam primus homo fuit creatus: tamen nihilominus manet etiam in Sanctis post Baptismum materiale peccati, concupiscentia carnis, ἀταξία, infirmitates, praua inclinationes, defectus,

defectus, peccata ignorantia & omissionis, qua omnia pugnant contra Iusticiam in Deo, & contra normam diuina legis, suntq; sua natura peccata, & uoluntaria, & remittuntur sanctis propter Christum. Hinc querela Apostoli: Noui quod non habiter in me, hoc est in carne mea, bonum. Item: Video aliam legem in membris meis repugnantem legi mentis mea, & captiuum reddentem me legi peccati. Peccatum nesciebam nisi lex dixisset, Non concupisces. Obnoxia est eadem de causa, Ecclesia morti, & orat quotidie: Dimitte nobis debita nostra. Pie dixit quoq; diuise Augustinus de remiss. peccatorum libro 1. cap. 25. de nuptijs & concupiscentijs ad Valerium, & libro 6. cap. 6. contra Iulianum: Remittitur per Baptismum concupiscentia carnis, non ut non sit, sed ut in peccatum non imputetur, quamuis reatu suo soluto, manet tamen, donec sanctur omnis infirmitas nostra.

#### XVIII.

Non approbamus eorum sententiam, qui statuunt, in Sanctis non esse quod rationem peccati habeat, & negant concupiscentiam in renatis sua natura esse peccatum, sed fatemur Sanctos habere peccata, & peccatum originis non tantum poenam & causam peccati esse, sed etiam verè peccatum esse, & pios debere iuxta Apostolicam admonitionem prauis inclinationibus resistere Spiritu, & mortificare concupiscentiam carnis, deponere veterem hominem ac induere nouum, qui iuxta Deum conditus est per iustitiam, sanctitatem, & ueritatem.

Cum



## XIX.

*Cum duplex sit peccatum actuale, non regnans seu veniale, & regnans siue mortale, asserimus Concupiscentiam carnis in renatis veniale peccatum esse, quo Gratia, Spiritus & Fides non amittitur, si modo pii dolent propter inherentes sordes, eūq; repugnant, ac credunt sibi remitti propter Mediatorem Christum, seq; Deo placere propter eundem Mediatorem. Vnde Apostolus præcepit militare bonam militiam, seruare fidem & bonam conscientiam, ac simul promisit, nullam esse condemnationem his, qui insiti sunt Christo Iesu, qui non iuxta carnem, sed iuxta spiritum uersantur.*

## XX.

*Hypocritarum impiorum hominum, & eorum qui discedunt à fundamentis cœlestis doctrinæ, & ruunt in delicta contra conscientiam, omnia peccata esse mortalia digna morte æterna & damnatione, testatur ipse Filius Dei Iohan. 3. Nisi quis renatus fuerit ex spiritu & aqua, non potest introire in regnum Dei. Item: Qui non credit, condemnatus est. Et Paulus ait: Si secundum carnem vixeritis, moriemini. 1. Iohan. 3. Qui committit peccatum, ex Diabolo est.*

## XXI.

*Habent præterea etiam irremissibile peccatum, qui verbum Dei predicatum confirmatumq; diuinus testi-*

nis testimonijs pertinaciter ad extremum vita spiritum reponunt, & in Epicureo isto contemptu, ac in alijs contra conscientiam peccatis cum desperatione gratia Dei perseverant. Super hos certum est manere iram Dei, & maledictionem legis, & ipsorum cōiucium seu peccatum in Spiritum sanctum, nec in presenti nec in futura vita remitti. Remissibile uerò peccatum habent, qui exemplo Dauidis & Pauli pœnitentiam agunt, & credunt sibi propter Christum, condonari peccata, vnde etiam de peccato in Spiritum sanctum à posteriori iudicandum esse arbitramur. Hanc veram de peccato Ecclesia Catholica doctrinam esse iudicamus, ac rogamus aeternum DEVM, vt per sanguinem Filij sui vni-  
geniti Domini nostri IESV CHRISTI, munda-  
re nos uelit tum ab occultis, tum ab reliquis om-  
nibus nostris peccatis, nosq; Spiritu suo sancto gu-  
bernare, vt carnem cum concupiscentijs suis cruci-  
figamus, & simus in Christo sancti, irreprehensi-  
biles, accepti DEO, ac tandem liberati  
ab omni peccato, perueniamus ad  
vitam aeternam, & aeternam  
beatitudinem.

A M E N.



*Secunda D. Georgio*

*Ludero.*

Q V Æ S T I O.

V. Cum nomen Pœnitentiæ magis congruere ad contritionem seu pauores & dolores videatur:

Rectè ad totam conuerſionem hominis complectentem contritionem, fidem & nouam obœdientiam accommodetur?

I.

**P**ost doctrinam de peccato ualde necessarium est scire in Ecclesia, quid sit Pœnitentia uera, cum certum sit, quod hic locus summam totius Euangelij complectatur, & clarè monstret, quòdnam præcipuum sit beneficium Filij Dei. Non satis enim est nouisse quod omnes homines sint peccatores, & nascentur filij iræ, sed etiam necesse est nos edoceri, qua ratione ac uia à peccato & morte liberemur, nimirum per gratiam DEI, quæ sine exceptione omnibus hominibus in Euangelio offertur, & agentibus pœnitentiam, ac  
B fide

fide confugientibus ad Christum Mediatorem uere  
contingit.

I I.

In lingua latina, ut ex Gellio cernere licet, pœ-  
nitere tum dicuntur homines, cum quæ ipsi fecerim,  
aut quæ ipsorum uoluntate & consilio facta sunt, ea  
postmodum ipsis incipiunt displicere, & sententiam  
suam de iisdem mutant. Pœnitentia Græcis Μετάνοια  
dicitur, cuius uocis proprietatem una dictione  
à Latinis exprimi posse Ausonius negat. Lactantius  
commode resipiscentiæ nomine reddi posse existimat.

I I I.

Et si autem magis ad Contritionem seu pauores  
ac dolores, quam ad fidem & uiuificationem congru-  
re pœnitentiæ uocabulum uidetur: tamen Ecclesia  
rectè sic nominat totam hominis conuersionem, quæ  
dolores & consolationem, uel ut Paulus nominat,  
mortificationem & uiuificationem comprehendit.

I I I I.

Suntq; mutila & manca illa ueteres descriptio-  
nes: Pœnitentia est, plangere præterita delicta, &  
plangenda non facere. Item: Pœnitere est peccata  
deslere, & flenda non committere. Non enim osten-  
dunt diserte, quibus partibus constet & perficiatur  
pœnitentia, & quomodo sit salutaris. Ideo hanc  
no consilio & magna circumspectione compositam,  
& di-

et diserte rem ipsam notantem descriptionem illius  
omnino retinendam esse censemus: Pœnitentia, seu  
conuersio ad DEVM, est contritio, id est, uerus  
pauor et dolor cordis propter peccata nostra, et  
fide in Christum accipere remissionem peccatorum,  
reconciliationem, iustificationem et uiuificationem,  
et inchoare nouam obœdientiam.

V.

Ac de partibus pœnitentiæ nolumus mouere λό-  
γους, aut rixose cum quoquam contendere, si  
rei ipsius ueritas retineatur, ac sincere tradatur.  
Possunt enim tollerari qui duas pœnitentiæ partes  
faciunt, si quod omnino in tali partitione necessari-  
um est cum fide indissolubili nexu nouam obœdienti-  
am coniungant. Negat enim Apostolus nos alia fide  
iustificari et saluari, quam ea quæ efficax est per  
charitatem, hoc est, cuius præsentia per nouam obœ-  
dientiam ceu illustre signum declaratur.

VI.

Nobis tamen ualde probatur consilium eorum,  
quod tres Pœnitentiæ numerant partes, nimirum Con-  
tritionem, Fidem, et nouam Obœdientiam, cum ui-  
deamus eam partitionem ad rem ipsam declaran-  
dam, et crassos quorundam circa illam errores re-  
solvendos multum momenti afferre.

VII.

Est autem Contritio uerè expauescere agnitione  
re DEI aduersus peccata nostra, et dolere quod



Deum offenderimus, sicut de huiusmodi dolore diserte inquit Ezechias : Sicut Leo contriuit omnia ossa mea. Et de agnoscentibus sua peccata, ait Deus ipse apud Esaïam : Ad quem respiciam, nisi ad contritum spiritu, & tremementem sermones meos.

### V I I I.

Estq; omnino aliqua contritio in agentibus poenitentiam necessaria, iuxta dicta : Scindite corda uestra, & non uestimenta uestra : & conuertimini ad Dominum. Item : Tristitia secundum Deum, poenitentiam ad salutem non poenitendam efficit.

### I X.

Neq; tamen propter Contritionem nostram, vel alia merita remitti nobis peccata statuendum est, sicut Pontificij contendunt. Est enim huiusmodi opinio manifesta deprauatio doctrinae Euangelij & contumelia in Filium Dei, & adducit homines ad precipitium desperationis. Si enim oportet sufficientem esse contritionem, propter quam remissio peccatorum fiat, cum nemo statuere possit quod eam habeat, imo certum sit, quod a nemine haberi possit, necesse est conscientias hominum in perpetua dubitatione relinqui, quae mater desperationis est, cum qua exitium & mors aeterna coniungitur. Tradere etiam propter contritionem & alia nostra merita peccata remitti, est delere Euangelij doctrinam, & detrabere Filio Dei gloriam, quae ipsi soli debetur. Nam ut

Euan-

Evangelium nobis gratuitam Dei misericordiam offert, ita confirmat propter solius filij Dei passionem, mortem ac merita nobis peccata remitti, nos cum Deo reconciliari, adoptari in filios, & fide in ipsum consequi iustitiam, uitam & salutem eternam.

X.

Est etiam animaduertendus error, quod Pontificij in hac doctrina omittunt fidem, sine qua mutila & manca est poenitentia, & perniciosus est pauor & dolor ob admissa peccata, sicut exempla Cain, Saulis, Iudæ, & similium aliorum ostendunt. Ideo omnino necesse est, in doctrina de poenitentia, fieri mentionem fidei, quæ non tantum noticiam historie significat, sed etiam simul complectitur firmum assensum & fiduciam nitentem merito filij Dei, quæ usitate sic describi solet: Fides est assentiri omni uerbo DEI nobis tradito, & in hoc promissioni gratiæ, & est fiducia promissæ misericordiæ, qua cor propter Mediatorem & per eum, liberatur ex doloribus inferorum, & accedit ad Deum, & inuocat eum clamans, Abba pater, & hac uera consolatione acquiescit per Filium dato Spiritu sancto, ut dicitur apud Prophetam: Iustus fide sua uiuet. Et apud Apostolum: Ut promissionem spiritus accipiamus fide. Atq; hæc fides, ut rectè intelligatur, debet uniuscuiusq; animo semper obuersari admonitio D. Bernardi dicentis: Necesse est primo omnium credere, quod remissionem peccatorum habere non possis, nisi per indulgentiam Dei: sed adde, ut credas & hoc,

quod per ipsum peccata **TIBI** condonantur. Ideo etiam in Symbolo dicitur: Credo remissionem peccatorum, scilicet non solum alijs, sed etiam mihi contingere per & propter **CHRISTVM** mediatorem. Hoc enim qui non credunt, eos in aeternum perire necesse est, iuxta dictum: Qui credit in Filium, habet uitam aeternam, qui autem incredulus est Filio, non uidebit uitam, sed ira Dei manet super eum.

## XI.

Est itaq; **FIDES** præcipua poenitentiae pars, quæ uel per summam inscitiam, uel detestandam malitiam in doctrina de poenitentia omitti à Pontificijs solet, quibus omnes pios, propter gloriam Dei, honorem Christo debitum, ueritatem Euangelij & Ecclesiae incolumitatem ac propriam salutem, aduersari necesse est.

## XII.

Fidem sequitur noua Oboedientia, quæ propriissime secundum Pauli descriptionem est: Militare bonam militiam, retinere fidem & bonam conscientiam. Estq; tam arcta fidei & bonæ conscientiae copulatio & coniunctio, ut sicut nunquam sine radijs & luce est Sol, nec sine calore ignis: Ita nunquam sine bono proposito & aliquibus bonis operibus est Fides. Ac sunt hæc duo non temporis aliquo momento, sed ordine naturæ distincta. Estq; præsentiae ueræ fidei in animis certum signum & declaratio

ratio, nouitas uitæ, iuxta dictum Christi apud Iohannem: Ex hoc cognoscent quod discipuli mei sitis, si inter uos dilexeritis. Et Apostolus ait: In Christo Iesu neq; circumcisio neq; præputium quicquam ualeat, sed Fides quæ efficax est per Charitatem.

### XIII.

Estq; tantopere necessaria noua Obœdientia, ut manifestis testetur uerbis Apostolus, cum peccatis contra conscientiam fidem, absq; qua neq; remissio peccatorum, neq; iustitia et uita æterna nobis contingunt, non posse consistere, cum inquit: Debitores sumus non carni, ut secundum carnem uiuamus. Si enim secundum carnem uixeritis, moriemini. Si autem Spiritu facta carnis mortificaueritis, uiuetis. Item: Superinduemur, si tamen non nudi reperiemur.

### XIII.

Pontificij tres Pœnitentiæ numerant partes, uidelicet, Contritionem, Confessionem, et Satisfactionem, sed ita eas explicare consueuerunt, ut nihil sani in ea doctrina appareat, et multipliciter deprauatur promissio Euangelij, contumelia afficiatur Filius Dei, ad desperationem impellantur pauidæ mentes, et ab inuocatione Dei plane deterreantur. Primum enim omittunt, ut supra quoq; paucis ostensum fuit, maximè necessariam partem de Fide acquiescente in misericordia Dei, propter solum Mediatorem gratis promissa, Neq; de noua obœdientia quid sit,

quomodo fieri possit, cur placeat & prestanda sit, quæ peccata maneant in Sanctis, quæ admissa, gratiam, Spiritum sanctum, & Fidem excutiant, satis clarè auditores suos erudiunt.

## X V.

Deinde etiam illas partes, quas & nos admittimus, non rectè explicant, & accommodant ad fundamentum, sed hoc quantum in ipsis est, omnino labefactant & subuertunt. Nam licet & nos sequentes authoritatem Verbi DE I oportere aliquam esse Contritionem in agentibus pœnitentiam affirmemus, tamen non disputamus, an sit illa sufficiens nec ne. Scimus enim non posse mentem humanam satis agnoscere, & perspicere magnitudinem peccati, & ire Dei aduersus illud, Nec concedimus, sicut falsò docent Pontificij, Contritionem etiamsi sufficiens esse posset, mereri remissionem peccatorum. Nam hic bonor soli filio DE I debetur, iuxta dicta: Hic est agnus Dei, qui tollit peccata mundi. Item: Sanguis Christi emundat nos ab omni peccato.

## X V I.

Quod etiam spectat ad alteram partem, quam Confessionem appellant, certum est, quod non uno modo ea uox in Scripturis usurpetur. Primo enim ueram Contritionem, qua dolet homo, se habere peccata quibus offenderit Deum, significat, quam & ipsam esse debere in agentibus pœnitentiam affirmamus, & hoc modo non multum interesse inter Confessionem



ssionem & Contritionem, apparet. Deinde etiam significat confessionem culpæ, coniunctam cum petitione ueniæ & reconciliationis, quam esse aliquam non obœdientie partem fatemur. Qui enim iram & odium erga fratrem, a quo offensus est, retinet, & qui non petit, uel cupit sibi ignosci ab eo, quem offendit, is cum retineat propositum peccandi, & in peccatis contra conscientiam perseuerandi, non potest remissionem peccatorum petere a D E O. Atq; hoc est, quod apertis uerbis mandat Christus fraternam reconciliationem, inquiens: Si offeres munus tuum ad altare, & ibi recordatus fueris, quod frater tuus habeat aliquid aduersus te, relinque ibi munus tuum, & uade ac prius reconcilieris cum fratre tuo. Et in oratione Dominica petimus: Remitte nobis debita nostra, sicut & nos remittimus debitoribus nostris. Et alio loco ait Christus: Sic & Pater meus cœlestis faciet uobis, si non remisistis unusquisq; fratri suo de cordibus suis.

#### X V I I.

Verum in neutra harum significationum intelligi uolunt Pontificij nomen Confessionis, sed id accipiunt de omnium etiam arcanorum delictorum enumeratione, quæ fiat apud Sacerdotem, eo fine, ut huiusmodi enuntiatio remissionem peccatorum mereatur, quod dogma cum plane impium sit & contumeliosum in Filium Dei, & enumeratio ipsa neq; præcepta sit ipsam in Scripturis, & sit plane impossibilis, iuxta dictum: Delicta quis intelligit, meritò ab omnibus huiusmodi deliria reijciuntur, & damnantur.

## XVIII.

Neq; tamen errores & superstitiones circa hanc partem taxando, Confessionem, quam uocant priuatam, reijcimus ac damnamus, Sed eam multis de causis utilem, & in Ecclesia retinendam iudicamus. Nam & commodius possunt de rebus necessarijs commonefieri, & institui in priuato colloquio rudes, & eo modo melius consuli afflictis & fluctuantibus conscientijs potest, Et est priuata absolutio, non solum euidens testimonium de applicatione promissionis Euangelij ad singulos homines, sed etiam publici moris de recipiendis lapsis, qui opponi potest Catharic & Nouatianis, qui lapsis post Baptismum omnem ueniam denegarunt.

## XIX.

Cum enim non solum cogitatione de sua indigitate, sed etiam de particularitate uehementer crucientur anxie conscientie, consolatione plenissimus est mos priuatae absolutionis, qui testatur predicationem poenitentiae & remissionis peccatorum esse generalem, & pertinere ad omnes homines, & a regno Christi & beneficijs illius neminem cupidum remissionis peccatorum, iusticie, uite, & salutis eterne excludi, iuxta dicta Christi: Venite ad me omnes. Item: Neminem ad me uenientem, eijciam foras.

## XX.

Tertiam partem Poenitentiae fecerunt Pontificij Satisfactionem operis, quam de Operibus non mandauit

dati à Deo, quæ Indebita ab ipsis uocantur, item de fraternitatibus, indulgentijs, igne purgatorio, Missis & Vigilijs intelligunt. Quæ nugæ cum sint horribiles corruptelæ doctrinæ Euangelij, & obsecrent gloriam Dei, & merita Christi, ac multipliciter pervertunt conscientias, ac labefactent Fidem, meritò rejiciuntur & damnantur, & ita sunt, Dei beneficium, iam passim uoce & stylo piorum in Ecclesia doctorum detectæ & refutatæ, ut neminem amplius, quàm data opera cecutire uolentem, offendere possint.

### X X I.

Est enim manifestum, unicam esse Satisfactionem pro peccatis nostris, uictimam Filijs DEI, & satisfactiones ciuiles, ut partem nouæ obœdientiæ necessarius quidem esse, ne fides amittatur perseuerantia in malo proposito, sed non esse ullam causam aut meritum remissionis peccatorum, & iustificationis nostre coram DEO.

### X X I I.

Quemadmodum autem meritò taxantur & lamentantur errores Pontificiorum circa doctrinam de Penitentia, ita etiam accusanda est eorum seu infamia, seu audacia ac improbitas, qui hac ætate bono consilio de tribus pœnitentiæ partibus traditam doctrinam carpunt atq; conuellunt.

### X X I I I.

Non habere enim istos suæ reprehensionis ac damnationis satis iustas & idoneas causas, cuius medio

mediocriter in Sacrarum literarum lectione uersato liquido apparet. Primum enim falsissimum esse constat, quod negant Christum plures quam duas partes Pœnitentiæ numerare, atq; idcirco affirmant eos corrumpere sanam doctrinam de Pœnitentia, qui contritioni & fidei nouam obœdientiam, ut tertiam partem pœnitentiæ adiungunt. Quis enim ignorat nisi planè imperitus elementorum Christianæ religionis, mandasse Christum ab Apostolis prædicari in suo nomine Pœnitentiam & remissionem peccatorum, cum expressa mentione inchoationis nouæ obœdientiæ. Sic enim scribitur Matthæi ultimo: Euntes ergo docete omnes gentes, baptizantes eos in nomine Patris, & Filij, & Spiritus sancti, docentes eos seruare omnia quæcunq; mandauimus uobis. Et Iohannes Baptista, Omnino requirit ab agentibus pœnitentiam Iudæis, ut dignos pœnitentia faciant fructum. Et Apostolus aperte affirmat, non retinentes bonam conscientiam circa fidem naufragium facere.

#### XXIIII.

Sed negant in Ecclesia ferendam esse doctrinam, quæ fidem labefaciat, & pauidis conscientijs firmam eripiat consolationem, & affirmant talem esse doctrinam statuentem nouam obœdientiam ueræ conuersionis partem esse. Scire autem isti debebant, non esse idem sumere quod probare. Nam sicut priorem argumenti partem concedimus planè, & unam ipsis defendimus, ita posteriorem & id quod inde inferunt nequaquam admittimus. Non enim uolumus  
in lucra

in lucta fidei ad ullum opus humanum respicere pœ-  
nitentiam agentem, cum sciamus solius filij D B I  
merito unumquemq; credentem promissioni Euange-  
lij iustificari, & saluari, sed requirimus iuxta præ-  
ceptum Christi ueram ad Deum conuersionem, quæ  
nulla est, ubi manet propositum ruendi in peccata  
contra conscientiam, aut in his perseuerandi. Vbi  
enim hoc manet, fides apprehendens beneficia filij  
Dei, quæ singulis ad iustitiam imputatur, esse non  
potest. Qui enim spiritu Dei non ducuntur, illi non  
sunt filij Dei.

X X V.

Si qua autem sunt alia, quæ a maleuolis no-  
stris afferuntur contra usitatam in harum regionum  
Eclesijs & Scholis doctrinam, ea partim ex iam in-  
dicatis iudicari facile possunt, partim tam sunt inepta  
& futilia, ut nulla indigeant refutatione, sed ipsa per  
se concidant & euanescant.

X X V I.

Ex ijs autem quæ attingimus, quo isti spiritu im-  
pellantur ad contradicendum ueritati, & quo consi-  
lialiter bene constitutam doctrinam oppugnet,  
non obscure apparet. Ac uidemus studio contendendi  
& contradicendi usq; eò prouectos esse illos, ut eti-  
am ijs quæ luce meridiana, ut dicitur, sunt clariora  
tenebras inferre conentur, & negent contra scriptu-  
ram & manifesta exempla huius, esse distinctam re-  
missionem pœnarum temporalium a remissione cul-  
pe, cum uel solum exemplum primorum parentum  
nostro-



noſtrorum, qui remiſſa culpa maximis tamen calamitatibus & ærumnis huius uitæ & morte corporali puniti fuerunt, & pœna cædis atq; adulterij Davidis, ac communis experientia omnium etiam ſanctorum, qui propter peccatum coguntur mortem corporalem ſubire, ipſorum errorem uel potius furorem maniſeſte redarguat ac refutet.

## XXVII.

Verum de his pluribus nunc diſputare ſuperſedimus, ac planè ex prædictis apparere conſidimus, non ſolum quid uera pœnitentia ſit, & quibus illa partibus conſtet, ſed etiam, quod uera ratione his noua obœdientia adiungatur, quæ cum alibi copioſius, una cum cæteris ad hanc doctrinam neceſſarijs capitulis tradantur, ſummatim hoc loco attingiſſe ſufficiat.

Oramus autem ardentibus uotis æternum DEVM Patrem Domini ac Saluatoris noſtri IEſu CHRISTI, ut lucem ſuæ doctrinæ etiam de hac parte apud nos accenſam, ne extingui patiatur, ſed eam clementer ad omnem poſteritatem defendat & conſeruet, ad gloriam ſanctiſſimi nominis ſui, Eccleſiæ IEſu CHRISTI incrementum, & multorum hominum ſalutem.

A M E N.



### III.

## *Tertia D. Baltasari*

*Sartorio.*

### Q V Æ S T I O.

Cum Apostolus Paulus affirmet, hominem gratis sine operibus legis, iustificari:

**V** Nequaquam velit huiusmodi asseueratione à fide iustificante necessitatem bene operandi, seu præsentiam bonorum operum excludi?

#### I.



*V*llum est inter omnia, quæ innúmera sunt bonitatis diuina, opera, maius & admirabilius iustificatione hominis. Ad cæli enim & terra, cæterarumq; in illis creaturarum fabricationem, satis erat voluntas Dei, verbo dicentexpressa.

#### II.

*Ad innocentiam autem & salutem hominis in peccato & morte oppressi restituendam, esismentissimus Deus ingenti commiseratione, & vero*

vero Paterno dolore, ex interitu hominis affectum, salutisq<sup>3</sup> humana cupidissimus erat, cum satisfactionem ob delictum requireret tamen aeterna iustitia ipsius, ita voluit vnigenitum Filium suum, pro culpa hominis deprecantem satisfacere, & eum obædientem secundum immensa misericordie promissionem ad imas terra partes demitti, ut grauissimum onus peccati hominum sustineret, & ab his pœnas in se deriuaret, indignissima quoque perferendo & perpetiando, factus abiectissimus omnium hominum, plenus despectus & doloris.

### III.

Multò enim maius, & si ita loqui fas est, & perosius fuit, de lata lege dispensare, & contra eius sententiam hominem seruare, quam creaturam omnem condere.

### IIII.

Vt autem ad sui conditionem, homo qui nondum erat nihil quicquam contulit, ita qui iam perditus erat, multo minus ad iusticiam & salutem suam recuperandam, aliquid facere potuit.

### V.

Ergo ut creatio hominis immensa bonitatis diuina erat opus, ita iusticia & salutis eiusdem instauratio, qua tanto constabat precio, solum misericordie diuina est meritum, Hac .n. ut Augustinus

verbi

verbi utar, cum hominis conscientia mereretur  
damnationem, nec eius pœnitentia sufficeret ad  
satisfactionem, omnem superavit offensionem.

## V I.

Cum igitur hoc opere omnium summo, Deus  
maximè voluerit illustrem & commendatam sua  
misericordia laudem, gratissima etiam mente  
illud perpetuo agnosci & celebrari, nec quic-  
quam fert indignius, quam vel minimam repara-  
ta salutis partem, dignitati, virtuti, efficacia,  
operationi, vel quibuscunq; meritis humanis tri-  
bui, cum omnes omnium angelorum & hominum,  
vniuersaq; creatura, vires longe essent inferiores,  
quam vt deletio peccato & morte, hominem vitæ  
restituere Deoq; reconciliare possent.

## V I I.

Iustificatur autem homo, cum remissionem pec-  
catorum, consequitur, & gratuito reconciliatur  
Deo, & adoptatur ad vitam aternam: vt eius  
iustificatio non alia sit, quam acceptio remissio-  
nis peccatorum, imputatio iustitiæ, & gratuita re-  
conciliatio, seu acceptatio ad vitam aternam, vt  
testantur hæc dicta Tit. 3. Non secundum opera  
iustitiæ, quæ nos fecimus, sed secundum suam mi-  
sericordiam saluos nos fecit. Rom. 3. Iustificamur  
grati ipsius gratia, per redemptionem, quæ est  
in Christo Iesu, quem Deus proposuit in salutem.

# VIII.

Ac tantum abest, ad sui iustificationem  
mo aliquid ut possit, ut nec misericordiam Dei  
beneficia filij Dei agnoscere, multò minus app-  
hendere sibiq; applicare ualeat, id quod necesse  
fieri à iustificando, absq; singularis gratia Dei  
uelatione atq; dono. Quis enim est, qui mentem  
cognouit?

# IX.

Vt autem cognosci & applicari possint, in  
narrabili bonitate, promissio statim post lapsu  
primorum parentum edita est, qua deinceps se-  
reperita est, voce Prophetarum, & declarata i-  
lio Dei & Apostolis, quam necesse est audiri. In  
illam enim Deus semper fuit, est, & erit effus-  
qui per Filium dato Spiritu sancto in audientibus  
& non aspernantibus verbum, accendit veram  
dem, qua misericordia diuina gratia, & benefi-  
orum filij Dei merita apprehenduntur & app-  
cantur, à credentibus, ut certò & indubitato co-  
fidant, se habere remissionem peccatorum, se re-  
conciliatos Deo & acceptos ad vitam propter su-  
um, quem Deus proposuit ipse propiciatorem.

# X.

Hanc fidem promissione Dei nitentem, non  
diuinitus accendi à Filio dante Spiritum sanctum  
per verbum, edocent clarissima hac dicta Iohann.

Nam



Nemo uenit ad me, nisi ei fuerit datū à patre meo.  
 Matth. 16. Beatus es Simon Bar Iona, caro &  
 sanguis non reuelauit tibi, sed pater meus cœlestis.  
 Iohan. 6. Hoc est opus Dei ut credatis in eum, quem  
 misit. Philipp. 1. Vobis datum est pro Christo, non  
 solum ut credatis in eum: sed & patiamini pro eo.  
 Iohan. 1. Deum nemo uidit vnquam, Filius qui est  
 in sinu Patris aterni, ipse reuelauit nobis. Matt. 11.  
 Nemo nouit patrem, nisi filius, & cui voluerit filius  
 reuelare. 1. Corinth. 12. Nemo potest Iesum dicere  
 Dominum, nisi in Spiritu, qui ut 2. Corinth. 4.  
 dicitur Spiritus fidei, ita fides fructus eius, Gal. 5.

## X I.

Cum autem illa fide, qua non est humani in-  
 genij, arbitrij & potestatis, sed Dei donum Ephes.  
 2. verè fiat applicatio gratia diuina, & beneficio-  
 rum vnigeniti Filij Dei, propter quem homo iustus  
 reputatur: sapissimè Scriptura sacra hominem fi-  
 de iustificari asseuerat: Non quod tanta illius vir-  
 tutis & operis sit dignitas, ut id mereatur: sed quia  
 unicum est Organon & instrumentum, ex peculia-  
 ri Dei gratia ad hoc datum, ut merita filij gratui-  
 ti oblata accipiat, sibi vendicet, sua q̄z faciat.

## X I I.

Est enim nihil aliud, nisi mendica illa ma-  
 nus, qua id, quod ex visceribus paterna misericor-  
 dia Dei, benigna largitur manus, apprehendit, ca-  
 pit &

pit & custodit. Vel est etiam quasi Pala annuli  
complectens & continens preciosissimum, & omni-  
bus bonis diuenditis redimendum vnionem, qui est  
Christus Iesus.

### XIII.

Quare imprimis verus & proprius intellectus  
huius propositionis: Fide iustificamur, est conside-  
randus: Est autem Correlatiue intelligenda: per  
misericordiam propter Christum promissam, quā  
fide accipi oportet, sumus iusti. Fides enim respicit  
promissionem, & ceu scopum cui intendat, perpe-  
tuo propositum habet Christum, quem intuetur, fa-  
ctum pro nobis peccatum, vt iustitia Dei effice-  
mur per illum. Huius meritis intrepidè acquiescit  
& firmissimè nititur. Ipsa enim licet excellens sit  
virtus: Tamen multò infirmior & imperfectior  
est, quam vt dignitati eius securè quis inniti possit.

### XIIII.

Ac vt omne id quod impetrat Fides, miseri-  
cordia diuinæ quam maximè acceptum feratur,  
vritur scriptura exclusiuis particulis  $\chi\omega\varsigma\iota\epsilon\ \nu\omicron\mu\omicron\varsigma$ ,  
 $\chi\omega\varsigma\iota\epsilon\ \epsilon\gamma\gamma\omega\rho$ ,  $\delta\omega\varsigma\epsilon\alpha\rho$ ,  $\epsilon\alpha\rho\ \mu\eta$ ,  $\mu\acute{o}\nu\omicron\nu\ \tau\eta\ \chi\acute{\alpha}\rho\iota\tau\iota$ ,  
& alijs, quarum vis cum clarissimè exprimat  
per particulam S O L A M, creberrimo etiam vsu  
omnes rectè sentientes in Ecclesia, ita illam sibi fa-  
miliarem fecere, vt & nihil usurpent frequentius,  
& habeant, de quo dimicent, firmitus.

X V.

Est autem eius vsus ob causas potissimum quatuor pernecessarius: Prima est, ut debitus bonus tribuatur Domino & Saluatori nostro Iesu Christo, tradito propter peccata nostra & resuscitato propter iustificationem nostram. II. Ut conscientia possint firmam habere consolationem, qua rata esse non potest, pendente promissione ex operum nostrorum dignitate, & non ex gratuita Dei misericordia, perinde ac Iona 2. dicitur: Frustra observant vanitates qui relinquunt misericordiam.

III. Ut illustrius sit Legis & Euangelij discrimen, quod constituit clarissime particula sola, excludens omnium operum, virtutum & meritorum dignitatem & causam, in impetranda iusticia & vita aeterna, qua lex maxime poscit & flagitat. IIII. Ut firmior esse possit inuocatio, cui semper obstat conspectus variorum peccatorum, lapsuum & infirmitatis, qua condonantur, uelantur, & reguntur gratuita Dei misericordia. Propter has causas omnium grauissimas, particula sola, mentibus firmiter insigenda est, & ambabus, ut dicitur, manibus retinenda. Nam & explicat reliquas exclusiuas, & monstrat illustrem antithesin vera & falsa doctrina de iustificatione.

X V I.

His veris & immotis fundamentis iusticia hominum coram Deo positus, omnino necesse est, verum & proprium sensum Exclusiuarum etiam diligen-

ter & accuratè cognoscere. Ha enim malè intellecta distorquentur, non minus ad extenuanda merita Filij Dei ab impijs, quam ad confirmandam prophanitatem & peccandi licentiam à sceleratù, qui se mala facturos vt bona eueniant, iactitant, quorum furoribus contradici necesse est.

## X V I I.

Sciendum itaq; est primum, nequaquam particulus illi à iustificatione hominis excludi & reijci obædientiam, passionem, sanguinem, mortem deniq; Domini & Saluatoris nostri Iesu Christi, quibus hoc prættextu quod dicitur: Carnem non prodesse quicquam: nostris temporibus quoq; quidam non minori furore ac impietate nullam vim & efficaciam adscribendam in iustificatione homini contenderunt.

## X V I I I.

Hac est manifesta blasphemia in Filium Dei. Cum .n. sanguis eius effusus sit in remissionem peccatorum, & sanguis eius mundet nos ab omni peccato: quomodo nō illi tota hominis iustificatio tribuenda est cum ea vt definitur à D. Paulo ex sententia Psalmi 32. nihil aliud sit, quam remissio peccati? Ac cum expresse dicatur Rom. 5. Obædientia eius iustos constitui multos, quomodo non illius obædientia nobis imputata, nostra iusticia est dicenda & habenda?

Arg.

Arg.  
excluda  
iusticia.  
Caro no  
tiff. &  
Dei: cu  
carnem  
nam a  
m iudi

De  
ysu re  
ter sen  
ab adu  
gustan  
denda  
renda  
des ex  
angeli  
n. Qu

contr  
di. N  
lurim  
Eac

## XIX.

*Arg. tantum abest, ut à iustificatione hominis  
excludantur, ut & meritum & causa & ipsa sint  
iusticia. Nam horrenda est impietas, illud Ioh. 6.  
Caro non prodest quicquam detorquere ad sacra-  
tis. & à Gracis ζωοποιον appellatam carnem filij  
Dei: cum de ea dulcissima extet asseueratio: Edens  
canem meam & bibens sanguinem meum, habet  
nam aeternam, & ego resuscitabo eum in extre-  
mo iudicio.*

## XX.

*Deinde eiusmodi particulis, minimè rejicitur  
verbi diuini & Sacramentorum, sicut furen-  
ter sentiunt Enthusiastæ, & nobis falso affingitur  
ab aduersarijs, ut docet Apologia Confessionis Au-  
gustanae. His. n. cen Medijs utitur Deus ad accen-  
dendam fidem, imputandam iustitiam, & conse-  
rendam salutem aeternam. Ut dicitur Rom. 10. Fi-  
des ex auditu est, auditus per verbum Dei. Et Eu-  
angelium est potentia Dei ad salutem omni credē-  
ti. Quare de illis, Exclusivæ non sunt intelligenda.*

## XXI.

*Tertio nec etiam illa exclusam volunt à Fide,  
contritionem & propositum piè & religiose uiuen-  
di. Nam ut manifestissima ita verissima est copu-  
latiua: Agite pœnitentiam & credite Euangelio.  
Hec ut præcipit Euangelio haberi fidem, qua sola*



accipitur remissio peccatorum, iustitia & vita eterna, ita flagitat simul serium & ardentem dolorem propter peccata totamq; naturam deprauationem, & melioris vite frugem. Sicut expresse dicitur: Facite fructus pœnitentia dignos. Ac eodem modo D. Paulum, annunciaſſe gentibus vt agerem pœnitentiam, conuerterentur ad Deum, & opera facerent, quæ decerēt pœnitentiam, testatur Lucas in Actis Apostolicis cap. 26. Hæc cum indissolubili vinculo coniungantur, quis nisi in clarissima Euangelij luce cecutiens, aut salutaris conuersionis prorsus expers, ex intellectu prauo Exclusionarum distractionem eorum faciendam putabit?

## XXII.

Poterit eum, modo conuerti uelit satis instruite, exemplum Latronis, qui ob transacta vitæ scelerata dolens, verè iram Dei expauescit, & Mediatorem Filium Dei in cruce pendentem agnoscit, eiusq; merito à peccatis & æternis pœnis se liberatum iri credit: ideo certa fiducia eum inuocat, profitetur Messiam, innocentiam eius prædicat, Deo se vt iustè punienti subiicit, & scelerum pœnarumq; suarum socium fraternè admonēdo & increpando ad pœnitentiam inuitat. Huius contritionem vt salutaris sit, excipit fides in Messiam, cui lucta est cum terrorib. cordis, quos superatos illa vincit & erumpit in inuocationem & amorem Dei & proximi. Hæc ita fieri in salutaris pœnitentia omnes p̃periuntur.

### XXIII.

*Et si autem illa simul cum Fide concurrunt :  
Tamen nec meritum , nec causa sunt iustificatio-  
nis : Sed Fides est , qua hominem peccatorem iustifi-  
cat , sola , non ex propria dignitate , nec etiam ea  
quam ex contritione & reliquarum virtutum cho-  
re , quem illa parit , & secum trahit , habere ab a-  
liquis putatur : Sed quod sola apprehendat mi-  
sericordiam propter Messiam promissam , eius me-  
ritum acquiescat illiusq<sup>3</sup> verè Deo reconciliatum sta-  
nat.*

### XXIII.

*Non igitur Contritio , bonum propositum ,  
amor Dei , inuocatio , humilitas , confessio , obedi-  
entia & alia iustitia & caritatis in proximum o-  
pera excluduntur , ne adsint fidei : Sed omnium  
operum & virtutum dignitas , causa , efficacia ,  
meritum , fiducia , gloriatio , persuasio &c. in im-  
petranda remissione peccatorum reijciuntur , quod  
nec supereminens gratia Dei opulentia illa ferat ,  
nec aduersus seueritatem iudicij Dei consistere  
possint.*

### XXV.

*Falsissimum igitur est maximeq<sup>3</sup> verbo diuino  
contrarium , bonorum operum praesentiam , siue ne-  
cessitatem benè operandi , excludi à Fide iustifican-  
te. Nam ne putetur illa eiusmodi esse , qua sit uel  
Historia tantum noticia , qualis est etiam damo-  
num,*

num, uel inanis & ociosa persuasio, qualis est Hypocritarum, describitur ea quod sit ἀνυπόκριτος, id est, non simulata. 1. Timoth. 1. & ἐνδογυμλῶν δὲ ἀγάπης, efficax per dilectionem. Gal. 5. Ac Dominus noster Christus Iesus, ut ostendit Matth. 7. τὸ ἀνυπόκριτον defuisse ihs, quos ut operarios iniquitatis à se repellit, ita proficitur Matth. 25. se ostensurum in extremo iudicio fidem, δὲ ἀγάπης ἐνδογυμλῶν non habuisse hædos, quos maledictos in ignem æternum est missurus.

## XXVI.

Ex his clarè perspicitur licet, à Salvatore nostro Caritatis opera non reijci, sed & postulari. Reijci autem & damnari persuasionem & fiduciam meriti, atq; adeo omnis in impetranda vita æterna efficacia. Quæ quidem persuasio tam longè abest à p̃ijs, ut quamuis eorum opera Filius Dei honorificè ornet & pradiet, ipsi tamen ea nequaquam iactent, & vere se reputant seruos inutiles.

## XXVII.

Etenim cum à Reuerendi nominis & sanctæ memoria Doctore Luthero, Fides in Argumento Germanico Epistola ad Rom. vocetur, Vinum, efficax, operosum, & potens quiddam, quod non possit non, sine intermissione benè operari, quomodo operum bonorum præsentia ab ea excludatur? imò cum Fides sit, desinente eam Epistola ad Hebræos, rerum

verum non apparentium substantia, & rerum spec-  
tandarum Argumentum, qualis Fides erit sine spe,  
expectante vita & salutis aeterna hereditatem,  
cuius promissionem Fides in praesentia amplecti &  
certò credere debet?

## XXVIII.

Et cum ipsa iustificatio sit acceptio remissionis  
peccatorum, & teste Christo eum multum diligere  
necesse sit, cui remissa sunt multa, quomodo aut  
cognare aut sentire quis potest, se accipere remissi-  
onem peccatorum, & habere Deum propitium, &  
non eundem diligere? Certè aut ἀποιδνκτορ esse  
oporet fidem, aut dilectionem, quam ex se parit,  
coniunctam habere.

## XXIX.

Præterea cum definiatur iustificatio, quod sit  
gratuita reconciliatio seu acceptatio ad vitam æ-  
ternam, qui fieri potest, ut credens quamprimum  
agnoscit Deum sibi reconciliatum, & Patrem per  
Filium redditum, quem monstrante Filio & per  
Verbum accendente Fidem, agnoscit, non eundem  
statim amet? Non illud dicam, quod perspectum  
est omnibus sanis, infantes quàm primum per ata-  
tem cognoscunt, deosculari & deamare parentes  
suos: sed hoc potius, si credens non diligit. Ergo o-  
dio habebit. Quod si oderit, fugiet potius, quam de  
eius voluntate paterna sibi aliquid promitteret.

Quare

X X X.

*Quare aut Fidei erit coniuncta dilectio, aut necesse est illam cum peccato mortali consistere, quod est contra manifestam scripturam: Qui non diligit manet in morte, & contra Apologiam Augustana confessionis, sic enim legitur in Exemplaribus etiam Iena expressis. Neq; vero hac Fides est ociosa noticia, & potest stare cum peccato mortali, sed est opus Spiritus sancti, quo liberamur à morte, quo eriguntur & viuificantur perterrefacta mentes. Item: Fides qua accipit remissionem peccatorum, non potest existere cum peccato mortali.*

X X X I.

*Verissimum igitur est, Fidem iustificantem: ubicunq; & quandocunq; est, vera dilectionis causam esse: eamq; ex se gignere, nec absq; ea esse, nec alteram ab altera, vt proprium effectum à sua causa, separari posse.*

X X X I I.

*Ac ne nobis aliquo saltem veritatis prae-textu affingi queat, nos cum impio Pontificiorum grege facere, & idem quod ipsi de Fide formata caritati agere: & ea, quae de veris causis Iustificationis initio posita sunt, nos purgabunt, & autoritas ipsi Reuerendi Domini Lutheri, sanctissima memoria, excusabit: Is enim in Epistola ad Gal. distincte*  
docet,



docet, quomodo Fides formata caritate non iustificet, & Fides ἀνυπόκειτ & iustificet, & clarè ostendit doctrinam de Fide formata caritate ideo non ferendam, 1. Quod perfectio Fidei tribuatur charitati. 2. Quod iustificatio non fidei sed caritati potius dicetur. Horum neutrum, à nobis fieri vident & intelligant, omnes, quibus veritas est cordi.

### XXXIII.

Cum autem Fides vera non sit absq; dilectione, cui iam dubium incidere potest, de reliquo pulcherrimarum virtutum Deoq; gratissimorum operum choro, isne & Fidei adsit? Cum enim dilectio Dei nihil aliud sit, quam servare mandata eius, 1. iob. 5. necesse est veram Fidem multis praeclaris virtutibus pralucere.

### XXXIII.

Quid quæso indignius cogitari potest, non tantum de Fide, sed & de autore Fidei, qui est Spiritus sanctus, ipsam quidem Fidem accendere solam, sed aliquanto quiescere eundem, & sibi temperare, quo minus statim cum ea excitet alios pios & sanctos motus, dilectionem, spem, timorem, invocationem Dei, gratiarum actionem, & alios pietati & iusticia cultus?

Nónne

# XXXV.

Nónne per Christum , non modo gratia sed & veritas, nec tantum Gratia, sed donum per gratiam nobis contingit? Nónne ipse factus est nobis, non tantum sapientia & iusticia, sed & sanctificatio & redemptio? Quid autem absurdius & ineptius, quàm sanctificationem ad aliquod temporis intervallum à Iustificatione diuellere, quod non sit par eius, sed effectus & fructus: Cum in multo effectum videre liceat posteriorem sua causa non tempore, sed ordine natura, perinde ac est in Sole & luce, in vita & motu. Sic igitur verè Fidem priorem operibus & iustificationem sanctificatione statuimus, vt causam effectui, sed non tempore verum ordine natura.

# XXXVI.

Hanc necessariam connexionem causa & effectus declarat scriptura, cum nominat πῑςτῑς ἀνυπόκριτον & ἐνδοξασμῶν δι' ἀγάπης, & demonstrarunt illam passim patres cum illustribus sententijs, tum similitudinibus, ex quibus pauca subijciam.

# XXXVII.

Augustinus inter alia praeclare inquit Tractatu 61. in Iohannem: Ille credit in Christum, qui sperat in eum, & diligit eum. Nam si Fidem habet sine spe & dilectione, Christum credit esse.

non in Christum credit. Et ad Consentium Episto-  
la LXXXV. Pia Fides sine spe & caritate esse  
non vult. Sic igitur homo fidelis debet credere, quod  
nondum videt, vt visione & speret & amet. Idem  
Sermone de tempore LIII. Vt ociosa Fides est si-  
ne operibus, ita nihil proficiunt opera bona sine Fi-  
de recta. Bernhardus Sermone XXIII. in  
Cantica canticorum inquit: Quid diuidis actum à  
Fide? iniquè diuidis, Fidem perimens tuam: Nam  
Fides sine operibus mortua est.

### XXXVIII.

Nota est etiam Reuerendi Domini Lutheri  
vr: Fides iustificat sola, sed non est sola: Idem  
in cap. 15. Genes. Scimus Fidem nunquam esse so-  
lam, sed adferre secum dilectionem, & alia multi-  
naria dona. Ibidem: Fides secum ducit cumulum  
multarum pulcerrimarum virtutum, & nunquam  
est sola. Et cap. XXII. eiusdem operis: Fides  
ita adheret operibus, vt non possit ab illis separari.  
In 2. capite Epistola ad Galatas. Fides sine operi-  
bus nullius est momenti & vsus. Ac in argumento  
2. Epistola Petri dicit eam esse scriptam contra  
istos, qui putant Fidem sine operibus esse.

### XXXIX.

In Argumento autem Epistola ad Roman.  
vritur hoc simili: Tam impossibile est Fidem sepa-  
rare ab operibus, quam impossibile est vrere & la-  
cere ab

cere ab igni separari. Et in cap. 3. ad Gal. confert  
connexionem fidei & operum, Causa scilicet &  
effectus, copulationi duarum naturarum in Chri-  
sto, quæ certè ἀχωρίσως ἡγήσεται ὁ θεὸς ἰουδαίως vna  
sunt.

X L.

Ex his quid clarius, quid dilucidius aut illu-  
strius, quàm per exclusiuas operum bonorum pra-  
sentiam à vera fide non excludi? Quod ergo atti-  
net ad hoc, in actum ne iustificandi, qui nescio quo  
circulo, articuloq; fingitur, admittatur, adducor  
vt hoc asseuerem: Cum in iustificatione Fides verè  
accipit remissionem peccatorum, agnoscit & sta-  
tuit Deum patrem, & certò sibi promittit heredi-  
tatem vitæ aeternæ, non posse non, eam illo ipso ar-  
ticulo momentoq; dilectionem & spem ex se gigne-  
re. Alioqui aut vera fides non erit, aut prorsus  
ἀναίδητος. Cum igitur hoc fiat, quis non videt  
opera, nec à fide excludi aut separari posse, etiam  
in ipso actu iustificandi? Adsunt autem illi non  
vt causa, non vt meritum, sed vt fructus in quibus  
Fides lucet.

X L I.

Ac imaginatio illa, de actu peculiari certo  
foro, certòq; articulo temporis circumscripto, quàm  
aliena sit à sacra scriptura, quis est qui non intelli-  
gat? Nam cum iustificatio nostra sit remissioni  
peccatorum acceptio, & remissionem peccatorum,  
non tantum omnibus diebus, sed & assidue peti-  
cesse sit,

cesse sit, secundum id quod dicitur : Remitte nobis debita nostra, qui potest iam ad certum Articulum temporis, iustificatio restringi ? Certè illa imaginatio de aliquo peculiari tempore, non caret periculo grauissimo.

## XLII.

Non ignoro autem contra hanc nostram sententiam ualde plausibiliter obijci : Ergo nostra Opera in conspectum Dei adducuntur, & eius iudicio opponuntur ? Quod quidem ut Blasphemum est in Filium Dei, ita periculosissimum conscientijs. Huic obiectioni licet respondere possem, aliud est presentia esse opera, aliud ad opera se conuertere, Vel potius ea Deo obuertere & opponere : quod fieri solet in persuasione meriti, causse & efficacie, qua iurè damnatur : tamen malo Reuerendi & magni nominis Lutherum, pro me ei satisfacere. Is autem in 15. cap. Genes. ait : Scio Fidem non esse absq; eiusmodi donis, Sed hic questio est, quid viriq; Fidei & Operibus conueniat : Clare & expresse dico, quid Fides per se sola agat & operetur, & non quibus cum virtutibus & operibus agat & ornata sit : Fides autem per se sola apprehendit promissionem, credit Dei promissu, & quod offert & dat illi Deus, porrecta manu accipit : sed dilectio, spes, patientia &c. audiunt quod Deus mandat & precipit, non quod promittit, id quod est solius fidei. Hac clarius exponuntur in sequentibus. Nam ut Deus secundum Prophetam Ieremiam po-

D

tissimum



tiſſimum reſpicit fidem, & propter fidem perſo-  
nam. Ita Fides reſpicit promiſſionem gratuita mi-  
ſericordiæ Dei, quæ ſola iuſtificat, non ad opera,  
quæ ſe ſubmittere debent Deo, eiꝯq; ſeruire.

X L I I I.

Poſſet & iꝯ aliquis moueri, quæ dicuntur à  
D. Paulo, ſine lege reuelari iuſticiam Dei, & absq;  
operibus hominem iuſtificari. Item: Deum iuſtifi-  
care impium, id eſt, non habentem opera bona &  
operanti mercedem non imputari pro gratia Dei,  
ſed pro debito. Sed ſi quis uelit, animaduertet eo-  
rum declarationem partim ex ſupra poſitis, par-  
tim ex contextu narrationis Apoſtolica pendere.

X L I I I I.

Nam eſi promiſſio Euangelij nobis reuelata  
eſt ſine lege, tamen eſt comprobata testimoniolo-  
gis, & cum Chriſtus ſit finis legis, Lex per Fidem  
promiſſionis ſtabilitur. Hac Fides iuſtificat ſola,  
non (dicente Auguſtino in lib. de Fide & Operi-  
bus) vi ea percepta & profeſſa, opera iuſticia con-  
temnantur, Sed ut ſciat ſe quiſq; per Fidem poſſe  
iuſtificari, etiamſi opera legis non præceſſerint, ſe-  
quuntur enim iuſtificatum & non præcedunt iu-  
ſtificandum: Sequuntur autem non ex interuallo  
temporis. Idem in Pſal. 67. ait, Sine bonorum-  
perum meritis iuſtificatur impius, ſicut dicit Ap-  
ſtolus, credenti in eum qui iuſtificat impium, de-  
putatur

putatur Fides ad iusticiam, vt deinde ipsa fides per dilectionem incipiat operari.

X L V.

Præterea comparatio quam instituit Paulus inter operantem & credentem, illustris est ex Antitesei vocabulorum Fidei & Operum, Gratia & Mercedis, imputationis & debiti. Hac ita inter se confert: Vt operanti non imputatur, sed debetur merces iusticiæ: Ita credenti non debetur, sed Fides imputatur per gratiam ad iusticiam. Confert autem, vt inde colligat & ostendat, Abraham non ex operibus, sed ex Fide iustificatum: cum scriptura dicat, eum credidisse, & imputatum esse ei ad iusticiam. Hanc esse Apostoli Pauli sententiam series narrationis, quæ perspicua est, euidenter docet. Non igitur illa eò trahenda est quasi excluderet benè operandi necessitatem à Fide. Sed manifesta est asseueratio, eum qui iustificatur fide, non posse laudem iusticiæ habere ex operibus. Et contra eum, qui ex operibus iusticiæ laudem quarit, tam à fide, quàm à gratia alienum. Vt enim opera eligit, neglecta fide, ita mercedem sectatur spreta gratia.

X L V I.

Ac verum & proprium intellectum hunc esse exclusiuarum, vt omnium maximè demonstrat Paulus: cum dicit exclusam esse gloriationem, ita

omnes omnibus temporibus Orthodoxi senserunt.  
Quare ut illa constanter & contra impiam &  
blasphemiam Phariseorum & Pelagianorum sen-  
tentiam propter quatuor causas, supra positas, vi-  
genda sunt: Ita proprius & genuinus eorum sen-  
sus contra Enthusiasticos & Antinomicos furem  
firmiter retinendus. Contra quos ipse quidem Fi-  
lius Dei, qui veritas est, asserat puritatem doctri-  
nae suae, eamq; in tranquillo Ecclesiae & Respublicae  
statu benignè tueatur. Cui cum aeterno Patre  
in communitate sancti Spiritus sit laus,  
honor, & maiestas, seculis  
in seculis,

A M E N.



obo  
par  
m  
c  
no  
c  
na

# IIII.

## Quarta D. Zachariæ

Schiltero.

### QVÆSTIO.

V. Cum iustitia & salus æterna contingat credentibus sola Dei misericordia propter Filium Dei mediatorem, nullo operum suorum merito aut dignitate:

Incoatio nouæ obædientiæ secundum præscriptum legis diuinæ in his rectè dicatur necessaria?

I.



Eligiosa pietas nequaquam dubitat, quin ueræ doctrinæ de iustificatione hominis coram DEO utiliter, immò necessariò attexatur commonefactio de necessitate bonorum operum seu nouæ

obædientiæ in reconciliatis & renatis incoanda, partim quia Paulus methoði optimus magister in omnibus fermè epistolis hunc ordinem sequitur, ut doctrinæ de iustificatione cohortationem ad studium bonorum operum annectat, partim ut sycophantiæ & calumniæ aduersariorum refutentur, qui doctrinam Ecclesiarum nostrarum de iustificatione homi-

D 3

nis co-

nis coram DEO gratuita per fidem absq; operum  
merito, tanquam corruptelam & pestem bonorum  
morum & laxationem discipline & Epicurea se-  
curitatis causam damnant, & fulmine anathematis  
feriunt, partim ut taxetur profanitas, imò horri-  
bilis furor ueterum & recentium Antinomorum,  
Libertinorum, Anabaptistarum, & Epicuri de gre-  
ge porcorum, qui libertatem Euangelij cum doctri-  
na, tum uitæ exemplo usq; adeo amplificant, ac si  
omnium legum repagulis remotis infinita peccandi  
licentia Euangelio concessa sit, credentibus non mo-  
do à maledictione, sed etiam ab obediētia legis per  
Christum liberatis, ita ut & d' iá q' o' q' illa sit, arbitra-  
ria & non necessaria: DEO scilicet non curante  
illam, nec ipsi possint excidere gratia DEI, excu-  
tere Spiritum sanctum & nouo obstringi reatu ue  
DEI, pœnarum præsentium & æternarum, que-  
cunq; tandem sit uita eorum, & quantumuis impu-  
ra & peccatis contra conscientiam contaminata.  
Quin etiam perniciosa esse ad salutem bona opera &  
summam Christianorum artem esse nescire legem,  
Cohorrescit pius animus sola mentione profanarum  
& prodigiosarum uocum barbarica impietate pelle-  
tium legem ex Ecclesia, ne sit unica & immota nor-  
ma operum & cultuum DEO præstandorum in hac  
uita, delentium conuersionem in credentibus, euer-  
tentium necessarium discrimen peccati regnantis &  
non regnantis, deniq; inciso neruo pietatis & mo-  
destiæ Christianæ, fenestram aperientium securis  
ingenijs furenter laxandi frenos omnibus iniussit  
cupidi



cupiditatibus, cum præsentissimo periculo uitæ, & salutis æternæ.

I I.

Intelligimus autem nomine bonorum operum, seu nouæ obœdientiæ in renatis incoandæ, non externam tantum disciplinam seu gubernationem locomotiuæ, neq; Philosophicam quandam moderationem affectuum & cupiditatum, ne in externa sagitta erumpant, quam duæ causæ efficere possunt, mens intelligens officia uirtutis, & uoluntas obtemperans recto iudicio mentis ( quanquam hæc facultas in hac infirmitate naturæ languidior est, & sepe impeditur insidijs diaboli ) ad quam scilicet Pontificij cum Phariseis nomen bonorum operum falso restringunt, quæ est umbra tantum ueræ obœdientiæ, & misera atq; immunda hypocrisis, non dissimilis filijs sici, quibus primi parentes tristissima uulnera à Diabolo sibi inflicta non sanabant, nec cætera membra omnia, in quæ uirus iam influxerat, sed unus tantum partis deformitatem externam utcunq; regebant: Verum hac mentione significamus totam obœdientiam interiorem & exteriorem, iuxta Decalogum, præcipue uerò nouitatem spiritus, hoc est, nouam lucem ueræ agnitionis DE I & rectum consilium in mente, firmam & gœdigeip uitandi peccata, & obœdiendi DE O iuxta omnia præcepta, propter hunc finem, ut DEVS honore afficiatur, in uoluntate, quibus indissolubili nexu copulata est in corde uera & non simulata gubernatio affectuum

secundum legem DE I praelucente fide, uerus timor  
DE I, fiducia, dilectio, spes, patientia, uera inuo-  
catio, iusticia erga proximos, castitas, ueritas, &  
alia egregie uirtutes à filio DE I uiuificante cor  
Spiritu sancto dato per ministerium uerbi & usum  
sacramentorum cum fide accense, quæ etsi non sunt  
integra impletio legis & conformitas cum DEO  
quæ tum demum nobis restituetur, cum abolito pec-  
cato & morte & communicata perfecta sapientia,  
iusticia & uita, DEVS erit omnia in omnibus san-  
ctis resuscitatis, suntq; tantum initia & primitiæ ue-  
ræ & æternæ iustitiæ & uitæ, multis magnis neuis  
& sordibus inherentis peccati horribiliter deforma-  
tæ: Certiss. est tamen placere eas DEO ὅτι  
ἡμεῖς τῆς χάριτος, ut Euagrius dixit, & orna-  
ri amplissimis præmijs, cum in hac, tum in futura  
uita propter filium mediatorem instar umbraculi &  
propitiatorij tegentis maculas & sordes languida  
& imperfectæ obœdientiæ credentium applicatione  
perfectissimæ obœdientiæ & meritorum suorum, ne  
in nos iræ diuinæ ignis omnia DEO non conformia  
consumens in hac uita exardescat, sicut testatur  
exemplum emendati latronis, in quo uiua imago  
conuersionis & saluationis singulorum electorum  
depicta est.

### III.

Hac uera & perspicua definitione, quæ sum-  
mam omnium questionum de bonis operibus conti-  
net, constituta, constanter cum pontificiorum cri-  
mina-

minationibus, tum Antinomorum furoribus oppo-  
 nitur hanc neq; dubiam, neq; obscuram, neq; im-  
 propriam, neq; insidiosam aut periculosam asserti-  
 onem: **NECESSARIA ESSE BONA**  
**OPERA**, id est nouam obœdientiam, Etsi enim  
 bona opera, neq; ex toto, neq; ex parte merentur re-  
 missionem uel culpæ uel poenæ æternæ, neq; sunt  
 causa siue principalis, siue minus principalis iustitiæ  
 æternæ. **DEO**, quam soli obœdientiæ & merito  
 Christi imputato credenti in solidum & ex asse, quod  
 dicitur, tribuendam testatur tota doctrina Euange-  
 lij: tamen huius necessitatis multe sunt aliæ causæ  
 grauissimæ, quæ partim ex doctrina legis, partim  
 ex articulis Symboli nostri, partim ex fine & usu  
 sacramentorum desumi possunt.

#### I I I I.

Ac primum consideratio **LEGIS** diuinæ, quæ  
 æterna & immutabilis norma sapientiæ & iustitiæ  
 in **DEO** est, locuples testis est nequaquam solui  
 donatione iustitiæ Christi, sed manere in omnem æ-  
 ternitatem ratum & firmum **DEBITVM** præ-  
 standæ **DEO** obœdientiæ, quod non uiolentam ali-  
 quam coactionem significat, quæ à seruis inuitis me-  
 tu poenæ aliquid operis extorquetur, ut quidam  
 insulse interpretantur, sed immotum ordinem diui-  
 num, quo obligata creatura rationalis spontè, qua-  
 tenus renata est, præstat obœdientiam creatori cum  
 quadam ευλαβείᾳ filiali & letitia acquiescente in  
**DEO** prælucente uera fide, iuxta præcepta passim

repetita in doctrina Euangelij: Debitores sumus. Nemini quicquam debeatis, præter dilectionem. Quod debuimus, fecimus. Item Hæc est uoluntas DEI, sanctificatio uestra. Item, Finis mandati est dilectio ex corde puro, & conscientia bona, & fide non ficta. Item, Milita bonam militiam.

V.

Non igitur liberatio à lege morali, de qua Paulus passim concionatur, intelligatur de toto termino, & de obœdientia legis, sicut furiosi Antinomi contendunt: non enim esset illa dispensatio, sed dissipatio, deletio & abrogatio legis pugnans cum dicto Christi, Non ueni soluere sed implere legem, item: si de stabilimus legem: sed de parte termini, uidelicet de pœnis æternis. Semper enim liberatos à culpa, & reatu pœnarum æternarum per fidem obligat lex ad obœdientiam & conformitatem cum hac norma in hac uita incoandam, & præstandam diligentiam & curam uitandi peccata mortalia, ita ut uel amplectentes & pertinaciter defendentes corruptelas fundamenti, uel ruentes contra conscientiam, iacturam faciant fidei, gratiæ DEI, Spiritus sancti, hereditatis uitæ, & salutis æternæ, & pœnis legis rursus opprimantur præsentibus & æternis, nisi conuertantur, iuxta dicta: Si secundum carnem uixeritis, moriemini. Qui facit peccatum ex Diabolo est. Qui talia faciunt regnum DEI non possidebunt, Item bona conscientia repulsa, fidei quidem fecerunt naufragium.

Omni-

Omniū autem euidentissimè refutatur Antinomorum imaginatio tribus articulis symboli nostri, quorum PRIMVS testatur in hunc finem nos ad imaginem Dei conditos, ut Deum celebremus doctrinā & obœdiētia ad præscriptum uerbi ipsius composta, ut dicitur, Esaia 61. nos esse plantas satas ad orandam gloriam DEI, idq; non ut ipsi melius sit, qui est per se benedictus in secula, sed ut nostro exemplo etiam alij inuidentur ad agnitionem & celebrationem DEI, nec cuiquam scandalum præbeatur, aut attrahantur poenæ publicæ, sicut passim grauitè arguit hunc articulum in renatis, Christus & Apostoli, ut liquidò appareat credentes à fine, ad quem conditi sunt, nequaquam absolui per Euangelium, sed nouo uinculo ad eundem obligari & obstringi.

## V I I.

Cum autem natura humana in hac infirmitate, integra & perfecta obœdiētia archetypo sese conformare non magis possit, quam æthiops pellem suam mutare, aut pardus uarietates suas, ut loquitur Ieremias, gratissimam addit consolationem animis mentibus SECVNDVS ARTICVLVS testificans, ideo miranda DEI bonitate misisse filium DEI, ut ius legis, hoc est, amissam obœdiētiam legi debitam, non modo imputatione meriti, sed etiam incoatione nouæ obœdiētiae in hac uita nobis restitueret, perficiendam in omni æterna



nitate. Quemadmodum enim liberauit Israëlitas  
DEVS a tyrannide Pharaonis & Aegyptiorum,  
non ut deinceps Aegyptiorum, sed redemptoris DEI  
se se seruituti totos addicerent, ita certò statuendum  
est, non ideò sustinuisse ingens incendium iræ diuine  
in se se effusa & coniunctos cum hoc dolores inenar-  
rabiles  $\lambda\upsilon\tau\gamma\omega\tau\lambda\omega$  nostrum sudantem sanguinem &  
morientem in cruce, ut confirmaretur & augetur  
in nobis peccatum, & infinita uiolandi legem con-  
cederetur licentia, qualem male feriat Antinomi  
affectant, sed ut peccato & morte, merito & effica-  
cia huius in homine deletis & æternis bonis luce sa-  
pientiæ, iustitia & uita restitutis, homo rursus fie-  
ret templum DEI, & uas sanctificatum in honorem  
DEI, accommodum usibus Domini & ad omne opus  
bonum præparatum, ut 2. Tim. 2. scriptum est.  
Verissimum enim hac quoq; in parte est, quod Iur-  
consulti dicunt: Finem emtionis esse mutationem do-  
minij, teste Apostolo 1. Corint. 6. De hoc fine re-  
demtionis nostræ Zacharias pater Baptista Luca 1.  
inquit: Vt liberati de manu inimicorum nostrorum  
seruiremus ipsi in sanctitate, & iustitia coram ipso  
cunctis diebus uitæ nostræ. Et Paulus 2. Corint. 5.  
Pro omnibus mortuus est Christus, ut qui uiuunt iam  
non sibi uiuant, sed Christo. Et ad Ephef. 2. In  
Christo Iesu conditi sumus ad bona opera. Et ad Tit.  
2. Qui dedit semetipsum pro nobis, ut redimeret  
nos ab omni iniquitate, & purificaret sibi populum  
peculiarem sectatorem bonorum operum. Et Petrus  
in suis Epistolis passim in hanc sententiam concludi-  
tur grauiusimè.

Porro

# VIII.

Porro cum imbecilla natura humana secundo articulo edocta de toto beneficio filij Dei, quo ius legis in nobis restituitur, quod consistit in merito, quod imputando nobis applicatur per fidem, & in efficacia illius, de modo quo efficacie filij DEI fiat particeps, non possit non esse uehementer sollicita, ideo aptissimo ordine subiicit TERTIVS ARTICVLVS anxijis mentibus rursus consolationem dulcissimam, ostendens cum uera & uiua fide, accipiente imputationem alienae iustitiae Christi, qualem articuli omnes requirunt, in uera conuersione arctissimo uinculo copulatam esse donationem Spiritus sancti, qui cum sit substantialis amor & letitia coeterna inter Patrem & Filium & Viuificator, non potest non tales motus & uitam qualis ipse est, incredentibus accendere. Ideo Paulus inquit: Qui ducuntur Spiritu DEI, hi sunt filij Dei. Et qui non habet Spiritum Christi, hic non est eius. Item: Euangelium est potentia DEI. Item, ut promissionem spiritus accipiamus per fidem.

# IX.

Ac disertè Spiritus sanctus non modo Spiritus GRATIAE, sed etiam PRECV M uocatur, quod non tantum Fidem accendat & confirmet per uocem Euangelij & usum Sacramentorum, qua fit consolatio in corde & letitia acquiescens in Deo,  
qua

quæ nihil est aliud, quam testificatio quedam, quod  
 simus in gratia DE I, & retracti ex inferis, Sed  
 quod cum hac consolatione fidei sine interuallo &  
 successione temporis simul ueram INVOCATI-  
 ONE M accendat, quæ secum ducit chorum & co-  
 mitatum pulcerrimarum uirtutum spiritualium, ui-  
 delicet timoris DE I, bonæ conscientie, spei, deniq;  
 totius conuersionis, quæ ut cum iustificatione, ita &  
 cum inuocatione adamantino uinculo connexa est.  
 Et fons atq; incoatio est totius nouæ & æternæ ius-  
 titiæ & uitæ, iuxta dicta: Fide purificans corda.  
 Et Psal. 119. Viam mandatorum tuorum cucurri,  
 cum dilatares cor meum. Et 2. Cor. 3. Nos omnes  
 resecta facie &c. Et de uera Contritione Augusti-  
 nus inquit: Initium bonorum operum est confessio  
 malorum operum.

# X.

Hac de caussa Filius DE I seipsum generosissi-  
 mæ & fructuosissimæ Viti, & Capiti corporis sui,  
 quod est Ecclesia: Fide uerò sibi insitos fructiferis  
 palmitibus & membris corporis comparat, quod si-  
 cut corpus à capite sensum, motum & uitam accipit,  
 & felix prouentus fructuum bonæ indolis in arbori-  
 bus uitibusq;, & indiuiduus comes & participator  
 est: ita non potest ille, quod uita, uera lux hominum  
 & Sol iustitiæ ipse sit, sua efficaci presentia & imbu-  
 tatione fide in se manentes ac perseverantes sibi  
 ut capiti

capiti rursus agglutinos non illustrare, uiuifi-  
care, & fructibus spiritus & iustitiæ replere, ut his  
donis conuicti sciamus, quod nos in eo manea-  
mus, & ipse in nobis, ut Iohannes inquit. Ideo idem  
apostolus uim & uirtutem diuini, & immortalis  
seminis in renatis passim licentiæ carnis opponit, o-  
mnis natus ex DEO, inquit, non peccat, quia  
in eo DEI manet in eo. Item: Omnis qui non facit  
iustitiam, non est ex DEO. Item: Natus ex Deo  
custodit se, & malus non attingit eum.

## XI.

Et si autem negari non potest, scintillas uirtu-  
um spiritualium initio conuersionis, sicut & fidei ip-  
sæ ualde sentiri interdum exiguas, nec uno momen-  
to nouitatem spiritus totam perfici & absolui, atq;  
ad omnem uitam renatorum & perpetua ex-  
ercitia poenitentiae pertinere, habentem sua ut initia:  
ita incrementa quoq; & progressus, Spiritu sancto  
inde maiorem lucem & ardentiores motus ac ope-  
ra magis conspicua in homine accendente, transfor-  
mando eum ad imaginem DEI, secundum quam con-  
stitus est in iustitia & sanctitate ueritatis, à gloria  
in gloriam, ut spiritu uiuens, spiritu magis atq; ma-  
gis incedat & ambulet, sollicitus quomodo bonis ope-  
ribus præsit, ut quaecunq; sunt uera, honesta, iusta,  
pura, commoda, quaecunq; boni nominis, si qua uir-  
tutis, si qua laus, hæc cogitet & faciat, licet in magna  
infirmis

infirmirate carnis reliqua, sicut in uulnere sanari  
cœpto magna pars adhuc restat putris & purulenta:  
Hæc quamuis ita sint, fieri tamen non potest, ut effi-  
cacia Filij DEI, quæ sit per Euangelium & per  
usum Sacramentorum dato Spiritu sancto, uel  
momento ab ipsius præsentia in credente diuellatur,  
& seiungatur. Sicut enim DEVS ipse per se non  
est ociosus unquam, sed merus actus est, ut uerissime  
locuti sunt ueteres: ita ne ad momentum quidem ἄδ-  
γορ & fructibus spiritus uacuum relinquit eum, in  
quo habitat, ita ut noua obœdientia à fide non aliter  
abesse nequeat, atq; lux ab ortu Solis, calor ab igni,  
spiratio & motus à uiuente & ceteri effectus à pro-  
pria causa posita in actu, spacio temporis siue longo  
siue breui, separari nullo modo possunt, etsi ordine,  
quem natura rerum gignit, distingui utcumq; illa  
posse, non sit obscurum.

## XII.

Ideo Fidem ἁκαρπὸν καὶ ἄδγορ ut mortuam  
& simulatam, imò inane somnium aut uerius menda-  
cium passim aperte reijcit & damnat Scriptura cum  
uniuersa, tum imprimis non admodum obscuræ epi-  
stolæ Iacobi, Petri & Iohannis, quarum commune  
argumentum est grauissima exhortatio credentium,  
ut puritate uitæ & caritate fraterna Christum ex-  
primant & fidem suam conspiciendam præbeant.

Huc per



### XIII.

Huc pertinent grauissima sententia Luth-  
 eriana: Impossibile est Fidem esse sine assiduis, multis  
 & magnis operibus. Fides iustificat sola, sed nun-  
 quam est sola. Fides sine operibus est mortua, imò  
 non est fides. Impossibilis est separatio fidei & o-  
 perum. Dare credentem & non bene operantem  
 implicatio contradictionis. Item: Similitudo  
 fasciculi multiplicium seminum & granorum.  
 Gal. 15.

### XIIII.

Tantum autem abest, vt opera fidei antepo-  
 namus, impiè colludentes cum Pontificijs, qui sin-  
 gulis operibus iustificationem precedentibus pra-  
 pari homines merito congrui ad gratiam, sicut  
 valenti quidam nos falso criminantur, vt cum  
 scriptura, Augustino, Luthero, & Apologia aper-  
 te illa fidem sequi & comitari, sine tamen distin-  
 ctione temporis, fateamur, quod fructus arbore  
 priores nullo modo esse posse, non possumus non me-  
 morasse. Ac ne quis mentione noua obædientia seu  
 horum operum excludi à nobis fidem suspicari  
 possit, singulari studio retinemus & vrgemus in his  
 libris & Ecclesijs doctrinam duobus axiomatibus  
 à Chrysostomo comprahensam: ἡ δὲ ἐν ὁφείλει  
 ἀγάπης πίστις χωρὶς, μᾶλλον δὲ ἢ ἀντὶ τῆς  
 ἀγάπης ἐτίγας.

E

Diligen

Diligenter etiam necessitas & debitum praesentia operum in renatis, (quam ut partem vero poenitentia & conuersionis ad Deum & effectum ac fructum, seu testimonium, seu signum consequi fidei propter inseparabilem connexionem & consensum causa & effectus, simplici & pio studio urgemus contra Antinomos, sequentes ductum & auspicia Apostolorum docentium, quod Fides per dilectionem sit efficax. Item: Scimus quod transiimus à morte ad vitam, quia diligimus fratres. Item: Si cor nostrum non condemnauerint nos &c.) discerni debet à merito, dignitate, virtute & efficacia operum in salutis negotio, pro qua propugnatores iustitiae Fidei formata caritate Pontificij dimicant, opera cum iustitia Christi sociata meriti & dignitatis coniuncta iudicio Dei opponentes & augenti ac incrementi nonnihil ex coniunctione bonorum operum accedere inepti fingentes iustitia Fidei, qua ex inexhausta plenitudine meritorum Christi perfectissima & absolutissima est, atq; adeò, ut opera hoc respectu Eius adiuncta & assuta damni potius & σκωλας quam adiumenti aut incrementi rationem habeant affirmet Apostolus. Atq; nota sunt omnibus, Dei beneficio, causa, cur usurpentur & fideliter incendantur in articulo Iustificationis particula Exclusiue, videlicet ut exclusa non quidem praesentia obedientia & piorum motuum à saluandis, ut

dam pertinaciter contendunt, sed conditione dignitatis & meriti nostrorum operum, filio Dei suus honor constet & certa de gratuita reconciliatione conscientia vincere dubitationes & terrores & alacriter Deum inuocare possit.

## XVI.

Postremo confirmant hanc nostram sententiam de necessitate nouæ obediencie in renatis Sacramenta, quæ non tantum sunt sigilla iustitiæ fidei, sed etiam Symbola renouationis spiritualis, ut Baptismus est stipulatio bonæ conscientie erga Deum, ligans omnes homines ad agnitionem & cultum Dei & admonens renatos, ut vi mortis & sepulture Christi mortificent carnem cum suis concupiscentiis & virtute atq; efficacia resurrectionis eiusdem, de morte peccati ad vitam resurgant iustitia per Spiritum sanctum, idq; in spem latæ resurrectionis mortuorum, ad vitam æternam, sicut apostolus inquit: Quod si spiritus excitauit Iesum a mortuis habitas in vobis, is qui excitauit Christum ex mortuis, viuificabit & mortalia corpora vestra propter ipsius Spiritum habitantem in vobis, ut quotquot in hac vita à peccatu ad nouitatem vitæ non resurrexerint, eos neq; in extremo à morte ad æternam vitam per eundem spiritum resurrekturos esse rectissime concludatur, præsertim eodem apostolo alibi dicente: Superinduemur, si tamen non nudi reperiemur. Item: Qui

hanc spem habet sanctificat seipsum &c. Item  
2. Pet. 1. efficiemini diuinæ consortes natura, si  
modo refugeritis à corruptione, quæ est in mundo  
per concupiscentiam. Et 1. Cor 10. de Cæna Do-  
mini scriptum est: Vnus panis & vnum corpus su-  
mus, quotquot eundem panem manducamus.

Possent hac sanè pluribus illustrari & confir-  
mari: sed quid opus est verbis, vbi res ipsa loqui-  
tur? Doleamus potius Antinomorum siue affecta-  
tam cecitatem, quæ ad clarissimam lucem doctri-  
næ oculos occludunt in semel arrepta opinione quo-  
modocumq; retinenda & defendenda obstinati  
perseuerantes, siue impudentiam & peruersita-  
tem, quæ agnita veritati contra conscientiam con-  
tradicare non desistunt atq; vtramq; improba-  
tem toto pectore detestemur & fugiamus tan-  
quam σαρκισμὸς diaboli acerbè illudentis & in-  
sultantis languida & frigida knechtæ mundi, in  
qua resfrigescente caritate abundat iniquitas &  
transfertur gratia εἰς ἀσελγείαν. Quin potius,  
quantum hoc donum sit, quod in hac vita incoat in  
nobis Filius Dei, sapè & attentè cogitemus idq;  
grati retinere studeamus accensi vero ῥήλω πνε-  
rum & sanctorum operum, & inter magna at  
multiplicia impedimenta, quæ studio bonorum o-  
perum, partim intus, partim foris obijciuntur, as-  
siduè implorantes auxilium & gubernationem  
Spiritus sancti, qui vt bonorum operum ἀρχηγός  
est: ita eorundem τελειώτης καὶ βεβαιώτης ἐσ-  
τιν.

certissimè futurus est, & quanquam intel-  
ligimus per se manca, mutila & immunda esse o-  
pera nostra, nec dissimilia sordidis centonibus, vt  
Isaias inquit: tamen certò statuamus placere Deo  
propter filium, in quo sumus completi, eumq; hac  
sua dona amplissimis premijs cum in hac, tum in  
altera vita paterna bonitate corona-  
turum esse, cui sit laus, honor,  
victoria, seculis in-  
finitis,

A M E N.

